

CABINET CYNGOR GWYNEDD



Adroddiad i gyfarfod y Cabinet

Dyddiad y cyfarfod:	16 Hydref 2018
Aelod Cabinet	Nia Jeffreys, Aelod Cabinet Cefnogaeth Gorfforaethol
Swyddog Cyswllt:	Dilwyn Williams, Prif Weithredwr
Teitl yr Eitem:	Trefniadau ar gyfer cynnal adolygiad rheolaethol.

Y penderfyniad a geisir

Fel rhan o'r adolygiad rheolaethol, bod y Cabinet yn derbyn y syniad o eistedd mewn ar y sesiynau herio y mae'r Prif Weithredwr yn bwriadu eu cynnal ac eu bod hefyd yn cydsynio i'r syniad o wahodd Cadeiryddion ac Is Gadeiryddion y Pwyllgorau Craffu (gan gynnwys y Pwyllgor Archwilio) i'r sesiynau hyn.

Cefndir

1. Yn ei gyfarfod ar 22 Mai eleni, bu'r Cabinet yn trafod y rhagolygon ar gyfer sefyllfa ariannol y Cyngor am y cyfnod i ddod, ac fel rhan o'r trafodaethau hynny fe nodwyd ar adeg o argyfwng ariannol, y dylem fod yn ystyried a oes angen cyfyngu mwy ar y swyddogaeth reolaethol o fewn y Cyngor. Wedi dweud hynny, fe gydnabyddwyd hefyd ein bod yn hollol ddibynnol ar reolwyr da i arwain ein staff drwy'r cyfnod anodd yma.
2. Yn sgil y drafodaeth a gafwyd fe gomisiynwyd adolygiad o'r fath (ac i gynnwys Craffu yn y broses honno) er mwyn sicrhau fod ein trefniadau rheolaethol yn addas at ei bwrpas. Er na ddylem ragdybio fod yna unrhyw ostyngiad am fod mewn nifer rheolwyr, os cyfyd unrhyw arbedion, gall fynd tuag at yr arbedion yr ydym eu hangen.
3. Mae'n bwysig nodi fod Deddf Llywodraeth Leol a Thai 1989 yn nodi mai swyddogaeth Pennaeth y Gwasanaeth Taledig yw adrodd ar y nifer a graddfeydd staff sydd eu hangen er mwyn i'r Cyngor gyflawni ei swyddogaethau ac i ystyried sut y dylid trefnu'r staff hynny.
4. Rhaid bod yn glir felly mai mater i'r Prif Weithredwr yw cyflwyno adroddiad i'r Cabinet ac yna mater iddynt hwy yw derbyn ei argymhellion neu beidio.

5. Wedi dweud hynny, mae angen i'r rhai sydd am gymryd y penderfyniad terfynol (sef y Cabinet) ddeall y rhesymeg y tu ôl i unrhyw argymhellion gan y Prif Weithredwr.
6. Fel rhan o'r broses o lunio adroddiad o'r fath, bydd y Prif Weithredwr yn cynnal sesiynau herio priodol gyda Phenaethiaid Adran er mwyn herio'r trefniadau presennol ac felly, er mwyn sicrhau fod aelodau'r Cabinet yn cael y cyfle i glywed y gwahanol ddadleuon a chael cyfle eu hunain i herio a gofyn unrhyw gwestiynau sy'n eu taro ar adrannau unigol, bwriedir cynnwys holl aelodau'r Cabinet yn y sesiynau hynny.
7. Yn amlwg, mae angen bod mor gynhwysol â phosibl hefyd a chan fod yr adolygiad yn effeithio ar holl wasanaethau'r Cyngor, mae'r Prif Weithredwr yn awyddus hefyd i wahodd Cadeiryddion ac Is Gadeiryddion y Pwyllgorau Craffu i'r sesiynau herio er mwyn iddo gael eu barn hwy cyn llunio ei argymhellion.
8. Argymhellir felly fod y Cabinet yn derbyn y syniad o eistedd mewn ar y sesiynau herio ac eu bod hefyd yn cydsynio i'r syniad o wahodd Cadeiryddion ac Is Gadeiryddion y Pwyllgorau Craffu (gan gynnwys y Pwyllgor Archwilio) i'r sesiynau.

Sylwadau'r Swyddogion Statudol

Swyddog Monitro

Mae'r argymhelliad yn cynrychioli un elfen o'r broses o gynnal yr adolygiad rheolaethol. Bydd unrhyw weithredu canlynol yn amlwg yn ddarostyngedig i drefniadau perthnasol y Cyngor.

Pennaeth Cyllid

Fel cyd-destun i hyn, ymddengys fydd grant y Llywodraeth yn annigonol i gwrdd â chwyddiant, heb sôn am ofynion gwario oherwydd cynnydd mewn galw am wasanaethau'r Cyngor. Felly, yn wyneb yr her ariannol debygol, byddwn yn uchafu'r arbedion effeithiolrwydd gellid eu gwireddu cyn torri unrhyw wasanaethau i bobl Gwynedd. Bydd y drefn gynhwysol awgrymir yma yn ddull i adnabod os bydd arbedion effeithlonrwydd yn bosib wrth adolygu swyddogaethau rheolaethol y Cyngor.